

野

處

集

野處集

四庫全書珍本初集

別集部  
集類

欽定四庫全書

集部五

野處集

別集類五

元

提要

臣等謹案野處集四卷元邵亨貞撰亨貞字復孺淳安人至正間為松江訓導占籍華亭其仕履畧見於楊樞淞故述中今考集中有送族兄安仲還鄉序云至元中大父處州君以弗克終仕於宋晦迹華亭別業先子遂生

華亭至德間大父歸葬故里先子弗克舉家  
去至今為華亭人則自其祖時已僑寓松江  
非亨貞始占籍樞所述猶未詳晰也是編本  
出上海陸深家深之孫鄰以授稷而刊行之  
并所著蛾術詩選蛾術詞選為十六卷今詩  
詞二選世已無傳惟此本獨存共雜文六十  
八首亨貞終於儒官足蹟又不出鄉里故無  
雄篇巨製以發其奇氣而文章大致清利步

伐井然猶能守先正遺矩者案陶宗儀南村  
輟耕錄載亨貞所作咏眉目沁園春詞二首  
雋永清麗頗得倚聲三昧蓋所長尤在於此  
惜詞選已佚今不可得而見矣乾隆四十二  
年九月恭校上

總纂官臣紀昀臣陸錫熊臣孫士毅

總校官臣陸費墀

平大員恭錄

計隨車三於今至阿勒山星其最遠者

萬夫而黑阿爾納魯三樣蓋低水手其教

神隨其遠者亦似其教其教其教其教

其教其教其教其教其教其教其教其教



欽定四庫全書

野處集卷一

元 邵亨貞 撰

記

靜默齋記

士生斯世所任者在乎道故聖賢立言垂訓載諸冊書以詒後世雖有智愚賢否而任於道一也其居塵垢之中紛紜萬變日遘於前乃心未始一日忘道予少時聞

諸老儒先生曰世道不古久矣人之命於天者有限而用於世者無窮孰不以功名利欲俗學嗜好累其心勤勞沒齒而不得與聞者蓋什八九矣惟其少思寡欲克已慎言者庶幾可與語此子其識之予取以為法焉而觀於世未有合者恐其以為迂未嘗以聞於人也雲間之南濱海地曰渾上士人何君彥敬世居之予聞彥敬久而未識朋游來者稱其潔修而好學端謹而有守克世其家者也今年夏介玄元院道士林德玄來告曰彥



敬名其居室曰靜默於以讀書求道而請記於予於是  
又知彥敬能違外聲利不循世俗而汲汲焉以道為急  
者林從予游有年言未嘗妄故信而不疑夫人之生也

闕

事父母畜妻子衣食居處凡人事之當然者矧

讀書為士自幼學而弱冠壯有室強而仕艾而服官政  
以至於致事必心計而躬營之又何可以無為而靜不  
言而默乎予天下之躁而多言者也心雖知之而不能  
自克今乃欲以靜默之義記人之室不亦謬乎雖然以

平日所聞於朋游與林之來言者而知彥敬所謂靜默者矣非以無為為靜不言為默也苟非吾所當為當言者則勿為勿言以固吾之志氣益吾之智慮若然則彥敬之居斯堂也旦旦而求之以至功名利欲不能動聲色臭味不能移鬼神變怪不能惑干戈鼎鑊不能懼彼事與物日以遠吾所造詣日以深廣則靜與默其殆庶幾乎經曰靜而後能安又曰默而識之盍求其所謂安與識者何事由是而聞道予又不可得而知也因林之

來請既起予之不能自克復誦向之得於老儒先生者  
俾歸之以為記

一枝安記

雲間為瀕海下邑因九峯三泖之勝而置官司焉跡其  
可考者晉陸士衡陳顧野王而下人才輩出民俗殷富  
逮唐宋間幾與列郡抗以五代南渡之亂民不知兵生  
聚五百餘年至宋末而盛劇矣宋社既遷名家鉅室罔  
不與國同休戚者貴游子弟華顛野服欵欵喬木之下

彷徨離黍之間相望於寬閒寂寞者百年於茲矣雲間  
遺族有三錢焉其一居市中者為武肅王諸孫今其人  
猶存而鐘鼎之習泯矣其一居市東者為叅政象祖之  
裔今不復見其人又其一居城西為南渡宦家支蔓最  
衍風流文采間有存者予及識其子孫四人復堂先生  
為宋季該博老儒予嘗受業門下太初先生為承平文  
物君子託跡浮屠氏以終皆典刑士也素菴子善詩詞  
清談卒為老子之徒今之存者惟南金君以明經教授

為錢氏文脈所在南金幼失父侍其祖長於異縣弱冠  
祖沒贅居三泖之上與予同里閉以文字交三十餘歲  
既乃更世故皆操觚出游南金問舍他鄉不相周旋者  
中又過半矣歲丙申浙右大亂南金所居悉嬰兵燹乃  
扁舟載妻子還泖上其門人曹幼文闢室館之一見握  
手問勞外南金曰偃蹇之蹤青氍去我久矣琴尊書卷  
亦復無幾彼皆身外物耳今幸見故人故人固知予胸  
中所存者不失也斯為無慨既得一室以禦寒暑日夕

起居其間動焉而運默焉而靜慨然而歎歌幽然而沉  
繹何適非吾名教之樂耶若然則天地萬物陰陽造化  
皆在吾一室中具當此之時又豈念夫先廬之喬木江  
湖之萍寓焉子其為我名之以識吾心所適子應之曰  
吾子既知夫一室之可安與天地萬化相為表裏將無  
適不安矣子復何言雖然杜子美當天寶之末奔走亂  
離至無所容其跡往往形於歌詩今皆宛然在目若所  
謂強移棲息一枝安者豈非君子居安慮危之道乎今



之出處殆類是也姑取斯言名子之居于居之以無忘  
四郊之多壘而以道自安當危之中所安者存斯與聖  
人所謂君子居無求安者合矣庶幾無所往而不得  
其安也南金作而曰子之言是矣取南華鷦鷯之喻以  
一枝為安而忘吾先廬之喬木者人之情也今子復以  
聖人之言勵予予益不敢以一枝自安以忘其身之情  
者此天下之言也敢不服膺遂書以揭諸室中云

仙鶴觀記

凡可以請命上帝以致下土之情者惟國家有圜丘明  
禋之禮至於方伯連率則禱於山川而已況其下者乎  
有虞氏絕地天通後世欲交於鬼神且弗可得又豈能  
導其心於高遠哉以是求之於人惟黃冠師為能然其  
道蓋出於黃帝老子也故歷代自京師至於郡邑山林  
之間皆設老子之宮以棲其徒講其道若官守之不可  
闕者凡禎祥孽厲有關於國與民必於是乎祈禳禴禋  
焉蓋其行純其心一斯得以通於神明也松江府治以

南二百步有觀曰仙鶴為一郡道家之總會其始建歲  
月蓋不可考跡其可知者宋紹興年間處州天真觀道  
士葉大直來為之主始克充廣之葉有道行善役鬼神  
嘗奏章與蜀某道士胥會天闕事聞於朝邦人為之興  
起乾道間進士陳箎朱飛卿鄭雍通判李杓等實歸其  
資葉乃樸斲梓材于其鄉浮之瀛海以至為寥陽殿于  
中前設三門旁立兩廡翼以經鐘二樓後建昊天寶閣  
又後為主者之居學者講習棲息之所以至庖藏湑澍